

Na un forma creativo Tio Ali a presenta su buki "Mannan di futuro di Aruba"



ORANJESTAD (AAN) – Diamars, pa 5.30 or di atardi, na Biblioteca Nacional a tuma lugar e presentacion oficial di e buki di e popular y hopi keri "Tio Ali" (autor y contador di cuenta di Curacao) "Mannan di futuro di Aruba".

Sr. Mirto Lacle a haci e introduccion di e autor, cu pa varios anja caba, ta participando den e Festival di Buki pa Mucha y a bira hopi popular y keri pa nos muchanan.

Tio Ali na un forma hopi creativo a haci e introduccion di su buki, cu el a presenta na Aruba prome cu na Curacao. Den e portada di e buni por mira pinta na diferente color e manan, cu ta e marcanan real di e mannan di varios di nos muchanan di scol, aki na Aruba.

Tio Ali a interpreta un cantica di su mes inspiracion yama mescos cu e buki "e mannan di e futuro di Aruba", y el a wordo acompaña un duo di mucha muher y pa e escritor Arubano sr. Robert Reeberg na guitarra.

E cantica ta proyecta e contenido di e buki, cu ta enfatiza con nos mester cuida nos muchanan y prepara nan como futuro generacion cu lo carga nos Isla riba tur tereno.

Na momento di entrega e buki oficialmente na man di director di BNA, Tio Ali a yama dilanti un par di mucha, un hoben, un adulto hoben, y algun persona di un generacion mas grandi, y asina e buki a cuminsa pasa for di chikito te adulto mayor, cu a haci entrega di buki na Biblioteca pa forma parti di su coleccion.

Tio Ali a skirbi e buki aki na Papiamentu estilo Arubano, y e ta haya cu na Aruba tambe por traha buki na "Papiamentu" manera Curaca y Bonaire, pasobra nos tin un destino cruza.

Pa medio di potret por tin un bista di e bunita actividad aki. Matutino DIARIO a entrevista Tio Ali, y dos autor mas di Curacao y Bonaire, cu nos lectornan por lesa den e transcurso di siman.

